

BESHINCHI BO'LIM

MA'MURIY JAZO QO'LLANISH TO'G'RISIDAGI QARORLARNI IJRO ETISH

XXV bob. ASOSIY QOIDALAR

325-modda. Ma'muriy jazo qo'llanish to'g'risidagi qaror ijrosining majburiyligi

Ma'muriy jazo qo'llanish to'g'risidagi qarorni korxonalar, muassasalar, tashkilotlar, mansabdor shaxslar va fuqarolar ijro etishi majburiydir.

326-modda. Ma'muriy jazo qo'llanish to'g'risidagi qarorni ijro etishga qaratish

Ma'muriy jazo qo'llanish to'g'risidagi qaror, basharti ushbu Kodeksda va O'zbekiston Respublikasining boshqa qonun hujjatlarida o'zgacha qoida belgilanmagan bo'lsa, chiqarilgan paytdan boshlab ijro etilishi lozim.

Ma'muriy jazo qo'llanish to'g'risidagi qarorga shikoyat berilgan yoki protest bildirilgan taqdirda bu qaror berilgan shikoyat yoki bildirilgan protest qanoatlantirishsiz qoldirilgandan keyin ijro etilishi kerak. Ma'muriy huquqbuzarlik sodir etilgan joyning o'zida undirib olinadigan jarima solish to'g'risidagi qaror bundan mustasnodir.

Jarima solish to'g'risidagi qaror uni ixtiyoriy ravishda bajarishning ushbu Kodeksning [332-moddasida](#) belgilangan muddati o'tib ketganidan keyin majburiy ravishda ijro etiladi.

(326-moddaning uchinchi qismi O'zbekiston Respublikasining 2019-yil 23-maydagi O'RQ-542-sonli [Qonuni](#))

Ma'muriy jazo qo'llanish to'g'risidagi qaror uni chiqargan organ (mansabdor shaxs) tomonidan ijro etishga qaratiladi.

327-modda. Ma'muriy jazo qo'llanish to'g'risidagi qarorni ijro etish

Ma'muriy jazo qo'llanish to'g'risidagi qaror ushbu Kodeksda va O'zbekiston Respublikasining boshqa qonun hujjatlarida belgilangan tartibda vakolatli organlar (mansabdor shaxslar) tomonidan ijro etiladi.

Bir shaxsga nisbatan ma'muriy jazo qo'llanish to'g'risida bir necha qaror chiqarilgan hollarda ularning har biri mustaqil ravishda ijro etiladi.

328-modda. Ma'muriy jazo qo'llanish to'g'risidagi qarorning ijrosini kechiktirish

Ma'muriy qamoqqa olish yoki jarima solish (joyning o'zida undirib olinadigan jarima solish bundan mustasno) tarzida ma'muriy jazo qo'llanish to'g'risidagi qarorni darhol ijro etishga imkon bermaydigan holatlar mavjud bo'lgan taqdirda, shu qarorni chiqargan organ (mansabdor shaxs) uning ijrosini bir oygacha muddatga kechiktirishi mumkin.

329-modda. Ma'muriy jazo qo'llanish to'g'risidagi qarorning ijrosini tugatish

Ma'muriy jazo qo'llanish to'g'risida qaror chiqargan organ (mansabdor shaxs) quyidagi hollarda uning ijrosini tugatadi:

1) amnistiya akti e'lon qilinib, u ma'muriy jazo chorasini qo'llanishni yo'q qilsa;

2) ma'muriy javobgarlikni belgilovchi normativ hujjat bekor qilingan bo'lsa;

3) ustidan qaror chiqarilgan shaxs vafot etgan bo'lsa.

330-modda. Ma'muriy jazo qo'llanish to'g'risidagi qaror ijrosining muhlati

Basharti ma'muriy jazo qo'llanish to'g'risidagi qaror chiqarilgan kundan boshlab uch oy davomida ijro etishga qaratilmagan bo'lsa, u holda bunday qaror ijro etilmaydi. Ushbu Kodeksning [318-moddasiga](#) muvofiq qarorning ijrosi to'xtatib turilgan taqdirda, kuchini yo'qotish muddatining kechishi shikoyat yoki protest ko'rib chiqilgunga qadar to'xtatib qo'yiladi. Ushbu Kodeksning [328-moddasiga](#) muvofiq qarorning ijrosi kechiktirilgan taqdirda, kuchini yo'qotish muddatining kechishi muddatini kechiktirish davri o'tgunga qadar to'xtatib qo'yiladi.

331-modda. Ma'muriy jazo qo'llanish to'g'risidagi qarorning ijrosi bilan bog'liq bo'lgan masalalarni hal etish

Ma'muriy jazo qo'llanish to'g'risidagi qarorning ijrosi bilan bog'liq bo'lgan masalalarni shu qarorni chiqargan organ (mansabdor shaxs) hal etadi.

Ma'muriy jazo qo'llanish to'g'risidagi qarorning to'g'ri va o'z vaqtida ijro etilishini nazorat qilish shu qarorni chiqargan organ (mansabdor shaxs) zimmasiga yuklatiladi.

Organlarning (mansabdor shaxslarning) ma'muriy jazo qo'llanish to'g'risidagi qarorning ijrosiga oid harakati xususida berilgan shikoyatlar ushbu Kodeksning [315-moddasida](#) aytib o'tilgan organlar tomonidan [319](#) va [320-moddalarida](#) belgilangan talablarga rioya etilgan holda hal etiladi.